



## SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka („Službeni glasnik BiH“ broj: 95/12 i 41/16), člana 25. Pravilnika o godišnjim finansijskim izvještajima političkih stranaka („Službeni glasnik BiH“ broj 96/13 i 89/16) i člana 18. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“ broj 103/08), izdajem

### IZVJEŠTAJ O REVIZIJI GODIŠNJEG FINANSIJSKOG IZVJEŠTAJA ZA 2016. GODINU I POSTIZBORNOG FINANSIJSKOG IZVJEŠTAJA - LOKALNI IZBORI 2016. GODINE **SAVEZA ZA BOLJU BUDUĆNOST BIH-FAHRUDIN RADONČIĆ**

Broj: 03-07-6-597/17  
Sarajevo, 17.08.2018. godine

## SADRŽAJ

MIŠLJENJE .....	3
1. UVOD .....	4
2. PREDSTAVLJANJE POLITIČKE STRANKE .....	4
3. OPIS REVIZIJE .....	5
Predmet revizije .....	5
Cilj revizije .....	5
Obim revizije .....	5
4. PRETHODNE KONTROLE I REVIZIJE .....	5
5. NALAZI I PREPORUKE REVIZIJE .....	6
5.1 NALAZI .....	6
5.2. PREPORUKE .....	11

## MIŠLJENJE

Služba za reviziju finansiranja političkih stranaka izvršila je reviziju finansijskih izvještaja Saveza za bolju budućnost BiH-Fahrudin Radončić za 2016. godinu, i to: godišnjeg finansijskog izvještaja za 2016. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2016. godine.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka i člana 15.10 Izbornog zakona Bosne i Hercegovine, te uspostavljanje efikasnog sistema internih kontrola.

Naša odgovornost je da izrazimo mišljenje na osnovu revizije koju smo izvršili.

Reviziju smo izvršili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garanciju da je stranka postupala u skladu sa odredbama Zakona o finansiranju političkih stranaka.

Revizija je na osnovu uzoraka ispitivala značajne transakcije koje potvrđuju iznose u finansijskim izvještajima, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka.

Smatramo da revizija koju smo izvršili pruža razumnu osnovu za izražavanje našeg mišljenja.

**Revizijom godišnjeg finansijskog izvještaja za 2016. godinu, utvrđeno je da je Savez za bolju budućnost BiH-Fahrudin Radončić prekršio odredbe člana 4. stav (1), člana 5. stav (4), člana 6. stav (2), člana 8. stav (1) i stav (4), člana 11. stav (1) i člana 12. stav (1), stav (3) i stav (4) Zakona o finansiranju političkih stranaka i člana 15.1 stav (1) Izbornog zakona Bosne i Hercegovine.**

**Prema našem mišljenju, osim navedenog, revidirani finansijski izvještaji ukazuju da je Savez za bolju budućnost BiH-Fahrudin Radončić u 2016. godini postupao u skladu sa odredbama Zakona o finansiranju političkih stranaka i odredbama člana 15.10 Izbornog zakona Bosne i Hercegovine.**

## 1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je reviziju finansijskih izvještaja Saveza za bolju budućnost BiH-Fahrudin Radončić za 2016. godinu, i to: godišnjeg finansijskog izvještaja za 2016. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2016. godine.

Revizija je preduzeta u skladu sa članom 10. stav (1) Zakona o finansiranju političkih stranaka, članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka. Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja za 2016. godinu, Savez za bolju budućnost-Fahrudin Radončić se finansirao iz sljedećih izvora<sup>1</sup>:

R/B	Izvori finansiranja	Iznos (KM)	Struktura (%)
1.	Članarina	50.385,64	2,51
2.	Prilozi fizičkih lica ( 3-a )	277.151,59	13,83
3.	Prilozi pravnih lica ( 3-b )	62.778,00	3,13
4.	Prihodi od imovine ( 3-c )	0,00	0,00
5.	Prihodi od dobiti preduzeća u vlasništvu političke stranke ( 3-d )	0,00	0,00
6.	Prihodi od poklona ( 3-e )	14.376,48	0,72
7.	Prihodi iz budžeta ( 3-f )	1.598.065,05	79,76
8.	Prihodi od propagande ( 3-g )	0,00	0,00
<b>I</b>	<b>Ukupni prihodi (1-8)</b>	<b>2.002.756,76</b>	<b>99,95</b>
<b>II</b>	<b>Ostali prihodi i drugo</b>	<b>957,54</b>	<b>0,05</b>
	<b>Izvori finansiranja (I+II)</b>	<b>2.003.714,30</b>	<b>100,00</b>

U godišnjem finansijskom izvještaju stranka je iskazala rashode u ukupnom iznosu od 1.496.715,26 KM.

## 2. PREDSTAVLJANJE POLITIČKE STRANKE

Naziv političke stranke je Savez za bolju budućnost BiH-Fahrudin Radončić. Skraćeni naziv stranke je SBB-Fahrudin Radončić.

Politička stranka je rješenjem broj: 065-0-F1-09-000035 od 30.10.2009. godine registrovana kod Općinskog suda u Sarajevu, pod nazivom Savez za bolju budućnost Bosne i Hercegovine i skraćenim nazivom SBB BiH. Rješenjem Općinskog suda u Sarajevu broj: 065-0-F1-10-000007 od 31.05.2010. godine, rješenjem broj: 065-0-F1-11-000002 od 18.02.2011. godine i rješenjem broj: 065-0-F1-14-000013 od 14.05.2014. godine promijenjeno je sjedište i naziv političke stranke u Savez za bolju budućnost BiH-Fahrudin Radončić i skraćeni naziv SBB-Fahrudin Radončić.

Sjedište političke stranke je u Sarajevu, ulica Tešanjaska 24 A.

Lice ovlašteno za zastupanje stranke je Fahrudin Radončić, predsjednik stranke.

Lice ovlašteno za podnošenje finansijskih izvještaja za 2016. godinu je Kanita Imamović.

Prema podacima iz godišnjeg finansijskog izvještaja za 2016. godinu, organizacionu strukturu Saveza za bolju budućnost-Fahrudin Radončić čine:

- Centrala stranke,

<sup>1</sup> Podaci iz korigovanog obrasca 3 (izvori finansiranja) godišnjeg finansijskog izvještaja za 2016. godinu, koji je dostavljen dana 18.07.2018. godine.

- 8 kantonalnih odbora,
- 67 općinskih odbora i
- Klub poslanika.

### 3. OPIS REVIZIJE

**Predmet revizije** je godišnji finansijski izvještaj Saveza za bolju budućnost BiH-Fahrudin Radončić za 2016. godinu i finansijski izvještaj za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2016. godine, i to sljedećih organizacionih dijelova političke stranke:

- Centrale SBB-Fahrudin Radončić Sarajevo,
- Kantonalnog odbora SBB-Fahrudin Radončić Srednjobosanskog kantona i
- Općinskog odbora SBB-Fahrudin Radončić Bugojno.

**Cilj revizije** je da se na osnovu provedenih revizijskih procedura pribave revizijski dokazi, koji će revizoru omogućiti da izrazi mišljenje o tome da li je Savez za bolju budućnost BiH-Fahrudin Radončić u izvještajnom periodu postupao u skladu sa odredbama Zakona o finansiranju političkih stranaka i odredbama člana 15.10 Izbornog zakona BiH.

**Obim revizije** finansijskih izvještaja Saveza za bolju budućnost BiH-Fahrudin Radončić obuhvata kontrolu finansijske dokumentacije i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na priloge fizičkih i pravnih lica, prihode iz budžeta i troškove izborne kampanje.

### 4. PRETHODNE KONTROLE I REVIZIJE

Služba za reviziju obavila je reviziju i pregled finansijskih izvještaja Saveza za bolju budućnost BiH-Fahrudin Radončić u periodu od 2010. do 2015. godine, nakon čega su izdati izvještaji o reviziji, odnosno izvještaji o pregledu sa nalazima revizije, mišljenjem revizora i preporukama stranci.

Nakon izvršenog pregleda godišnjeg finansijskog izvještaja za 2015. godinu, Služba za reviziju je izdala Izvještaj o pregledu sa mišljenjem revizora, nalazima revizije i preporukama stranci da finansijska sredstva obezbijedena za finansiranje stranke koristi isključivo za ostvarivanje ciljeva utvrđenih svojim programom i statutom, da poslovne knjige vodi u skladu sa računovodstvenim propisima, zaključuje glavnu knjigu na kraju poslovne godine, te je zaštititi od naknadnih izmjena knjigovodstvenih evidencija, da uspostavi potpune i tačne evidencije o novčanim tokovima gotovine, rahodima i obavezama stranke, te posebnu pažnju posveti vjerodostojnosti i ispravnosti knjigovodstvenih isprava. Stranci su, takođe, date preporuke da finansijske izvještaje koje podnosi Centralnoj izbornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka i da uredi blagajničko poslovanje i vodi računa o vjerodostojnosti dokumenata na osnovu kojih vrši isplate sredstava.

#### **Nerealizovane preporuke:**

Na osnovu uočenih nedostataka u godišnjem finansijskom izvještaju za 2016. godinu, utvrđeno je da Savez za bolju budućnost BiH-Fahrudin Radončić nije ispoštovao preporuke revizije.

## 5. NALAZI I PREPORUKE REVIZIJE

### 5.1 NALAZI

#### a) Savez za bolju budućnost BiH-Fahrudin Radončić prekršio je odredbe člana 4. stav (1) Zakona o finansiranju političkih stranaka.<sup>2</sup>

Na osnovu podataka koje je dostavila Općina Živinice, utvrđeno je da su u 2016. godini iz budžeta Općine Živinice na račun vijećnika<sup>3</sup> isplaćena sredstva u iznosu od 18.845,65 KM, te da je općina na isplaćena sredstva obračunala porez i doprinose u iznosu od 4.379,87 KM, što ukupno iznosi 23.225,52 KM.

Savez za bolju budućnost BiH-Fahrudin Radončić nije u svojim poslovnim knjigama evidentirao niti u godišnjem finansijskom izvještaju iskazao rashode po osnovu isplaćenih sredstava fizičkom licu u iznosu od 23.225,55 KM.

Na osnovu navedenog, utvrđeno je da sredstva primljena iz budžeta u iznosu od 23.225,55 KM nisu utrošena za ostvarivanje ciljeva utvrđenih programom i statutom stranke, čime su prekršene odredbe člana 4. stav (1) Zakona o finansiranju političkih stranaka.

#### b) Savez za bolju budućnost BiH-Fahrudin Radončić prekršio je odredbe člana 5. stav (4) i člana 6. stav (2) Zakona o finansiranju političkih stranaka.

- (1) Revizijom finansijskih izvještaja utvrđeno je da su prilozi pravnih lica „Karamujić“ d.o.o. i „Energy bentz“ d.o.o. u ukupnom iznosu od 3.000,00 KM uplaćeni na transakcijski račun organizacionog dijela Brčko, tj. nisu uplaćeni na transakcijski račun Centrale stranke, što je suprotno odredbi člana 6. stav (2) Zakona o finansiranju političkih stranaka.
- (2) Kontrolom prometa blagajne Općinskog odbora SBB Stari grad i izvoda sa transakcijskog računa, utvrđeno je da članarina naplaćena u gotovini, na blagajni ovog odbora, u iznosu od 942,00 KM nije uplaćena na transakcijski račun stranke, čime su prekršene odredbe člana 5. stav (4) Zakona o finansiranju političkih stranaka.

#### c) Savez za bolju budućnost BiH-Fahrudin Radončić prekršio je odredbe člana 8. stav (1) Zakona o finansiranju političkih stranaka<sup>4</sup>.

- (1) Uvidom u obrazac 3-e (nenovčane donacije i računi koje stranka nije imala obavezu da plati) godišnjeg finansijskog izvještaja utvrđeno je da je Savez za bolju budućnost BiH-Fahrudin Radončić primio nenovčanu donaciju Općine Centar u iznosu od 864,00 KM, čime je prekršio odredbu člana 8. stav (1) tačka a) Zakona o finansiranju političkih stranaka.

U postupku revizije finansijskih izvještaja utvrđeno je da je stranka oslobođena plaćanja računa broj: 5813-09/16 od 30.09.2016. godine za korištenje javne površine za postavljanje info stolova u periodu izborne kampanje 2016. godine, čime je ostvarila prihod u iznosu od 864,00 KM.

- (2) Savez za bolju budućnost BiH-Fahrudin Radončić je tokom 2016. godine besplatno koristio prostorije Udruženja žena „Ključki biseri“ Ključ, što je stranka i iskazala na obrascu 3-e (nenovčane donacije i računi koje stranka nije imala obavezu da plati).

<sup>2</sup> Prema odredbama člana 4. stav (1) Zakona o finansiranju političkih stranaka, finansijska sredstva iz člana 3. stav (1) navedenog Zakona stranka može koristiti isključivo za ostvarivanje ciljeva utvrđenih svojim programom i statutom.

<sup>3</sup> Sredstva su uplaćena na lični zahtjev vijećnika.

<sup>4</sup> Finansiranje političkih stranaka zabranjuje se: organima uprave države BiH, entiteta, kantona, Brčko Distrikta BiH, te gradskim i opštinskim organima; javnim institucijama; javnim preduzećima; humanitarnim organizacijama; neimenovanim, odnosno anonimnim donatorima; vjerskim zajednicama; sindikatima, udruženjima i drugim neprofitnim organizacijama koje se finansiraju javnim sredstvima bez obzira na iznos sredstava; pravnim licima u kojima uloženi javni kapital iznosi najmanje 25% i drugim državama, stranim političkim partijama i stranim pravnim licima.

Na osnovu prikupljene dokumentacije, utvrđeno je da se Udruženje žena „Ključki biseri“ Ključ finansiralo javnim sredstvima.

S obzirom da je Savez za bolju budućnost BiH-Fahrudin Radončić besplatno koristio prostorije Udruženja žena „Ključki biseri“ Ključ, koje se finansiralo javnim sredstvima, procijenjene vrijednosti od 1.032,32 KM, prekršene su odredbe člana 8. stav (1) tačka g) Zakona o finansiranju političkih stranaka.

- (3) Kontrolom poslovnih knjiga, utvrđeno je da je Savez za bolju budućnost BiH-Fahrudin Radončić izvršio otpis obaveza prema JP „Radio Novi Grad“ Novi Grad, čime je suprotno odredbi člana 8. stav (1) tačka c) Zakona o finansiranju političkih stranaka ostvario prihod u iznosu od 117,00 KM.

S obzirom da stranka nije imala obavezu da plati račun za emitovanje radio džingla, broj: 112/12 od 29.09.2012. godine, u iznosu od 117,00 KM, primila je nenovčanu donaciju, koju je u skladu sa članom 18. Pravilnika o godišnjim finansijskim izvještajima političkih stranaka imala obavezu da iskaže u obrascu 3-e godišnjeg finansijskog izvještaja.

- (4) Kontrolom izvoda sa transakcijskih računa stranke utvrđeno je da je BH Telekom izvršio uplatu sredstava na račun stranke u ukupnom iznosu od 178,00 KM. Stranka je ove uplate iskazala u obrascu 3-b (prilozi pravnih lica), na stavci priloga nižih od 100,00 KM.

Uvidom u Ugovor o pružanju usluge „Humanitarni broj“ od 18.03.2014. godine, utvrđeno je da se radi o sredstvima koja su stranci uplaćena na otvoreni broj kod telekom operatera.

S obzirom da stranka ne posjeduje podatke o identitetu donatora koji su dali priloge stranci, prekršene su odredbe člana 8. stav (1) tačka e) Zakona o finansiranju političkih stranaka.

**d) Savez za bolju budućnost BiH-Fahrudin Radončić prekršio je odredbe člana 8. stav (4)<sup>5</sup> Zakona o finansiranju političkih stranaka.**

Na osnovu obavljene revizije godišnjeg finansijskog izvještaja, utvrđeno je da je Savez za bolju budućnost BiH-Fahrudin Radončić primio priloge pravnih lica koja su sklopila ugovore o javnim nabavkama roba i radova sa organima izvršne vlasti na svim nivoima u Bosni i Hercegovini čija je vrijednost veća od 10.000,00 KM, u ukupnom iznosu od 1.200,00 KM, čime je prekršila odredbe člana 8. stav (4) Zakona o finansiranju političkih stranaka.

- Stranka je u toku 2016. godine primila prilog pravnog lica „Hifa Oil“ d.o.o. Tešanj u iznosu od 500,00 KM.

Prema podacima koje je dostavila Općina Banovići, pravno lice „Hifa Oil“ d.o.o. Tešanj je tokom 2016. godine imalo sklopljen Ugovor o nabavci robe sa Općinom Banovići u vrijednosti od 18.265,75 KM bez uračunatog PDV-a.

- Uvidom u finansijsku dokumentaciju i godišnji finansijski izvještaj, utvrđeno je da je Savez za bolju budućnost BiH-Fahrudin Radončić primio prilog pravnog lica „Cestotehnik“ d.o.o. Tuzla u iznosu od 200,00 KM.

Pravno lice „Cestotehnik“ d.o.o. Tuzla je u toku 2016. godine imalo sklopljene ugovore o nabavci radova na rekonstrukciji i sanaciji puteva, te rekonstrukciji trotoara, pješačkih površina i arhitektonskih barijera na području grada Tuzla u ukupnoj vrijednosti od 827.574,34 KM bez uračunatog PDV-a.

- Savez za bolju budućnost BiH-Fahrudin Radončić je dana 03.10.2016. godine primio prilog Advokata Esada Hrvačića u iznosu od 500,00 KM, te je isti i iskazao u obrascu 3-b godišnjeg finansijskog izvještaja.

---

<sup>5</sup> Privatna preduzeća koja su sa organima izvršne vlasti na svim nivoima u BiH sklopila ugovor o javnoj nabavci usluga, ugovor o javnoj nabavci robe ili ugovor o javnoj nabavci radova u skladu sa propisima o javnim nabavkama u BiH ne mogu finansijski pomagati političke partije ako vrijednost ugovora u jednoj kalendarskoj godini prelazi iznos od 10.000,00 KM.

Uvidom u Odluku o izboru najpovoljnije ponude za vršenje „Pravnih usluga-usluge pravnog savjetovanja i zastupanja“ broj: 01-02-14-1645-2/15 od 21.07.2015. godine, utvrđeno je da je Advokat Esada Hrvaića imao sklopljen ugovor o javnoj nabavi usluga sa Fondom Kantona Sarajevo za izgradnju stanova za članove šehida i poginulih boraca, ratne vojne invalide, demobilisane borce i prognane osobe na period od 36 mjeseci. Vrijednost ugovora za 2016. godinu iznosila je 10.256,41 KM.

**e) Savez za bolju budućnost BiH-Fahrudin Radončić prekršio je odredbe člana 11. stav (1) i člana 12. stav (1), stav (3) i stav (4) Zakona o finansiranju političkih stranaka<sup>6</sup> i člana 15.1 stav (1) Izbornog zakona BiH.**

Revizijom finansijskih izvještaja utvrđeno je da stranka nije vodila potpune i pravilne evidencije o prihodima, rashodima i obavezama u poslovnim knjigama i nije izvršila popis na dan 31.12.2016. godine u skladu sa računovodstvenim propisima, čime je prekršila odredbe člana 11. stav (1) i člana 12. stav (1) Zakona o finansiranju političkih stranaka. Takođe je utvrđeno da stranka nije popunila obrasce godišnjeg finansijskog izvještaja u skladu sa odredbama Pravilnika o godišnjim finansijskim izvještajima političkih stranaka-u daljem tekstu: Pravilnik, čime je prekršila odredbe člana 12. stav (4) Zakona o finansiranju političkih stranaka.

(1) Prema podacima iz poslovnih knjiga, potraživanja po osnovu akontacija datih tehničkim sekretarima organizacionih dijelova SBB BiH na dan 31.12.2016. godine iznosila su 51.896,68 KM.

Uvidom u raspoloživu dokumentaciju, utvrđeno je da su sredstva isplaćena 2014. godine, na račune tehničkih sekretara u općinskim organizacijama. U odlukama o isplati akontacija je navedeno da ova lica imaju obavezu da dostave račune na knjiženje u Centralu stranke, čime se vrši pravdanje utrošenog novca.

Imajući u vidu da stranka nije izvršila pravilan popis potraživanja po osnovu isplaćenih akontacija, u toku revizije je zatraženo da se upute konfirmacije svim licima kojima su isplaćene akontacije, kako bi se utvrdio tačan iznos zaduženog novca po organizacionim dijelovima stranke.

Na zahtjev revizora, stranka je od ukupno 50 lica za koja su u poslovnim knjigama evidentirana potraživanja po osnovu akontacija, dostavila potvrde o stanju zaduženja na dan 31.12.2016. godine<sup>7</sup> i Izvode otvorenih stavki<sup>8</sup> za tehničke sekretare u sljedećim odborima: OO Ilijaš na iznos od 495,68 KM, OO Novi Grad na iznos od 3,05 KM i iznos od 2.500,00 KM, OO Hadžići na iznos od 324,26 KM, OO Centar na iznos od 1.997,91 KM, OO Travnik na iznos od 1.052,60 KM, KO Tuzla na iznos od 5.439,60 KM i OO Bihać na iznos od 2.500,00 KM.

Pored navedenog, stranka je dostavila i potvrde o stanju zaduženja tehničkih sekretara na dan 31.12.2016. godine<sup>9</sup> u OO Mostar na iznos od 4,53 KM i OO Srebrenik na iznos od 2,40 KM, iako ova fizička lica prema podacima iz potvrda dostavljenih u avgustu 2017. godine nisu tehnički sekretari ovih odbora. Potvrde koje su dostavljene na dan 09.08.2017. godine za OO Mostar i OO Srebrenik su potpisala druga fizička lica, uz napomenu da su uz preuzimanje funkcija tehničkih sekretara preuzeli i novčana sredstva.

Kada je riječ o pravdanju utroška novca, uvidom u dokumentaciju OO Živinice o pravdanju akontacije, utvrđeno je da je su sredstva u iznosu od 1.491,66 KM isplaćena na osnovu računa za gorivo za januar 2016. godine, te da stranka ne posjeduje putne naloge niti drugu dokumentaciju

<sup>6</sup> U skladu sa odredbom člana 11. sta (1) Zakona o finansiranju političkih stranaka, politička stranka je dužna voditi poslovne knjige u skladu sa računovodstvenim propisima. U skladu sa odredbom iz člana 12. stav (1) Zakona dužna je uspostaviti evidencije o svim prihodima i rashodima, dok je u skladu sa odredbom iz člana 12. stav (4) dužna podnositi finansijski izvještaj u formi koju odobri Centralna izborna komisija Bosne i Hercegovine.

<sup>7</sup> Potvrde-izjave od 28.02.2018. godine.

<sup>8</sup> Izvodi otvorenih stavki za 5 fizičkih lica.

<sup>9</sup> Potvrde-izjave od 28.02.2018. godine.



iz koje se može utvrditi u koju svrhu su utrošena sredstva stranke. Prema podacima iz poslovnih knjiga, stranka u svom vlasništvu nema vozila, niti je utvrđeno da je vršen zakup vozila. Na isti način su izvršene isplate po računima za gorivo u iznosima od 261,04 KM i 406,42 KM za KO Srednjobosanskog kantona.

Na osnovu svega navedenog, Služba za reviziju u postupku revizije nije mogla potvrditi da potraživanja stranke po osnovu akontacija isplaćenih u 2014. godini tehničkim sekretarima u općinskim organizacijama na dan 31.12.2016. godine iznose 51.896,68 KM, odnosno da sredstva isplaćena 2014. godine općinskim odborima nisu utrošena.

- (2) Uvidom u dokumentaciju o isplatama putem blagajne Organizacije SBB BiH Brčko utvrđeno je da su iz blagajne izvršene isplate po računima izdatim na ime fizičkog lica, bez prethodne saglasnosti ili odluka općinske organizacije za isplatu računa, te suprotno propisima koji regulišu plaćanje gotovim novcem u Brčko distriktu BiH.

Naime, putem blagajne su izvršene isplate po računima dobavljača "Aragold" br. 3753/16 od 05.09.2016. godine u iznosu od 2.765,04 KM za nabavku kafe i br. 3752/16 od 05.09.2016. godine u iznosu od 2.656,95 KM za nabavku ulja i šećera. Na računima dobavljača "Aragold" koji su izdati na ime fizičkog lica je navedeno da će roba biti donirana Udruženju penzionera Brčko distrikta BiH. Takođe, putem blagajne su isplaćena sredstva za nabavku sredstava za higijenu i čokolade u ukupnom iznosu od 1.700,10 KM, a po računu „Asa company“ broj: MP-2726/16 od 19.09.2016. godine koji je, takođe, izdat na ime istog fizičkog lica.

Pored navedenog, dana 19.10.2016. godine iz blagajne je izvršena isplata gotovog novca u iznosu od 8.322,21 KM na ime plaćanja računa dobavljaču RZ Komerc doo broj: 23/16 od 04.10.2016. godine za štampu vizit karti, kataloga i reklamnih letaka. Stranka je ovaj račun u poslovnim knjigama evidentirala dva puta, čime je troškove kampanje, odnosno ukupne rashode uvećala za 8.322,21 KM<sup>10</sup>.

- (3) Politička stranka u finansijskom izvještaju nije tačno iskazala prihode iz budžeta, čime je prekršila odredbe člana 13. i 19. Pravilnika.

- Stranka je u obrascu 3-f iskazala prihode iz budžeta Općine Živinice u iznosu od 12.500,00 KM.

Uvidom u podatke koje je dostavila Općina Živinice, utvrđeno je da su u 2016. godini stranci isplaćena sredstva u ukupnom iznosu od 35.725,52 KM, od čega je na transakcijski račun stranke uplaćeno 12.500,00 KM. Sredstva u iznosu od 18.845,65 KM su uplaćena na račun vijećnika<sup>11</sup>, te je Općina Živinice na isplaćena sredstva obračunala porez i doprinose u iznosu od 4.379,87 KM, što ukupno iznosi 23.225,52 KM.

Savez za bolju budućnost BiH-Fahrudin Radončić je u svojim poslovnim knjigama prihode iz budžeta Općine Živinice iskazao u manjem iznosu za 23.225,55 KM, odnosno nije iskazao rashode po osnovu isplaćenih sredstava fizičkom licu u istom iznosu.

- Stranka je u poslovnim knjigama i godišnjem finansijskom izvještaju iskazala prihode iz budžeta Bosne i Hercegovine u iznosu od 75.712,50 KM, što je za 2.370,00 KM manje u odnosu na uplaćena sredstva. Prema podacima iz izvoda sa transakcijskog računa, stranka je iz budžeta Bosne i Hercegovine primila sredstva u ukupnom iznosu od 78.082,50 KM. Služba za reviziju je utvrdila da je stranka prihode iz budžeta u iznosu od 2.370,00 KM iskazala kao prihode od članarine.

- (4) Savez za bolju budućnost BiH-Fahrudin Radončić je u godišnjem finansijskom izvještaju iskazao troškove takse za ovjeru za učešće na Lokalnim izborima 2016. godine u iznosu od 18.300,00 KM.

<sup>10</sup> Stranka je u 2017. godini izvršila ispravka knjiženja u korist prihoda (nalog OS-000004 od 30.06.2017. godine).

<sup>11</sup> Sredstva su uplaćena na lični zahtjev vijećnika.

S obzirom da su stranci vraćena sredstva u iznosu od 13.600,00 KM, troškovi takse za ovjeru su iznosili 4.700,00 KM, koliko je stranka trebala i evidentirati u poslovnim knjigama i iskazati u godišnjem finansijskom izvještaju.

- (5) Kontrolom troškova telefona KO SBB BiH SBK utvrđeno je da troškovi telefona po računu dobavljača BH Telecom za decembar 2016. godinu u iznosu od 1.391,15 KM nisu evidentirani u poslovnim knjigama za 2016. godinu, niti iskazani u godišnjem finansijskom izvještaju.

Takođe je utvrđeno da je stranka troškove po računu „Transmont“ d.o.o. Kladanj u iznosu od 1.755,00 KM, a za uslugu prevoza članova stranke u 2012. godini, u poslovnim knjigama evidentirala u iznosu od 1.500,00 KM, što ukazuje da troškovi nisu evidentirani u momentu nastanka troška, što je suprotno računovodstvenim propisima.

- (6) Evidencije o troškovima izborne kampanje nisu blagovremeno uspostavljene. U postizbornom finansijskom izvještaju stranka je iskazala troškove izborne kampanje u iznosu od 323.041,96 KM, dok je u godišnjem finansijskom izvještaju iste troškove iskazala u iznosu od 426.349,76 KM. Neprijavlivanjem troškova u postizbornom finansijskom izvještaju u iznosu od 103.307,80 KM stranka je prekršila odredbe člana 12. stav (3) Zakona o finansiranju političkih stranaka i odredbe člana 15.1 stav (1) Izbornog zakona BiH.

- (7) Služba za reviziju je utvrdila da Savez za bolju budućnost BiH-Fahrudin Radončić nije u godišnjem finansijskom izvještaju i poslovnim knjigama pravilno iskazao troškove zakupa poslovnog prostora i obaveze prema zakupodavcu, čime su prekršene odredbe čl. 21., 22. i 24. Pravilnika.

Uvidom u ugovor o zakupu poslovnog prostora, utvrđeno je da su troškovi zakupa poslovnog prostora u Srebrenici evidentirani u poslovnim knjigama i u godišnjem finansijskom izvještaju iskazani u manjem iznosu u odnosu na ugovorenu cijenu za 600,00 KM.

- (8) Revizijom godišnjeg finansijskog izvještaja utvrđeno je da stranka nije izvršila usaglašavanje obaveza sa dobavljačima na dan 31.12.2016. godine što za rezultat ima pogrešno iskazane obaveze u poslovnim knjigama i obrascu 5 (obaveze političke stranke) godišnjeg finansijskog izvještaja, što je suprotno odredbama člana 24. Pravilnika.

- Uvidom u godišnji finansijski izvještaj utvrđeno je da je stranka u obrascu 5 iskazala obaveze prema JU Centar za kulturu Ahmed Mur u iznosu od 117,00 KM, što ne odgovara podacima iz Izvoda otvorenih stavki na dan 31.12.2016. godine. Prema podacima iz Izvoda otvorenih stavki stranka prema ovom pravnom licu na dan 31.12.2016. godine nema obaveze.

- Stranka je obrascu 5 godišnjeg finansijskog izvještaja iskazala obaveze prema dobavljaču Lupon Ventures u iznosu od 33.232,65 KM. Prema podacima iz Obavještenja ovog pravnog lica od 12.01.2017. godine, obaveze SBB BiH na dan 31.12.2016. godine iznosile su 34.513,80 KM. Stranka je u 2017. godini izvršila usaglašavanje obaveza sa dobavljačem i provela knjiženja u poslovnim knjigama za 2017. godinu.

- U obrascu 5 godišnjeg finansijskog izvještaja iskazane su obaveze prema dobavljaču JU Centar za kulturu i informisanje Srebrenik u iznosu od 1.032,40 KM.

Uvidom u račun za zakup poslovnog prostora u Srebrenici utvrđeno je da je stranka obaveze po ovom osnovu evidentirala na kontu obaveza prema dobavljaču JU Centar za kulturu i informisanje Srebrenik, čime je pogrešno iskazala obaveze prema dobavljačima JU Centar za kulturu i informisanje Srebrenik i JU Kulturni centar Srebrenica.

Prema podacima iz analitičke kartice konta potraživanja JU Centar za kulturu i informisanje Srebrenik od Saveza za bolju budućnost BiH za 2016. godinu, obaveze stranke prema ovom pravnom licu na dan 31.12.2016. godine iznose 882,40 KM, a nastale su 2013. i 2014. godine. Stranka je u 2017. godini izvršila usaglašavanje obaveza sa dobavljačem i provela knjiženja u poslovnim knjigama za 2017. godinu.

- Kontrolom podataka iskazanih na kontu potraživanja za date avanse i uvidom u izvode otvorenih stavki na dan 31.12.2016. godine, utvrđeno je da stranka nije u poslovnim knjigama i godišnjem finansijskom izvještaju iskazala obaveze prema pravnim licima: JU BKC Gračanica, Europronet i Privredna banka Sarajevo.  
Stranka je u poslovnim knjigama iskazala potraživanja za avanse od pravnih lica: JU BKC Gračanica u iznosu od 441,50 KM, Europronet u iznosu od 2.306,84 KM, JU Bosansko narodno pozorište Zenica u iznosu od 1.000,00 KM i Privredna banka Sarajevo u iznosu od 1.600,00 KM.  
Uvidom u izvode otvorenih stavki na dan 31.12.2016. godine utvrđeno je da obaveze stranke prema JU BKC Gračanica iznose 58,50 KM, pravnom licu Europronet 2.094,03 KM i Privrednoj banci Sarajevo 200,00 KM, dok stranka na dan 31.12.2016. godine nema obaveze prema JU Bosansko narodno pozorište Zenica.

### **Troškovi izborne kampanje**

Prema odredbama člana 15.10 Izbornog zakona Bosne i Hercegovine, politička stranka za potrebe izborne kampanje ne smije potrošiti više od 0,30 odnosno 0,20 KM<sup>12</sup> po biraču u svakom izbornom krugu, prema broju birača koje je objavila Centralna izborna komisija BiH.

Prema podacima Centralne izborne komisije BiH, na osnovu broja birača, Savez za bolju budućnost BiH-Fahrudin Radončić mogao je potrošiti 1.282.491,15 KM.

Politička stranka je u godišnjem finansijskom izvještaju, koji je podnijela Centralnoj izbornoj komisiji BiH, u svrhu izborne kampanje iskazala troškove u iznosu od 426.307,80 KM.

### **5.2. PREPORUKE**

***Preporučuje se Savezu za bolju budućnost BiH-Fahrudin Radončić da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:***

- ***da finansijska sredstva obezbijedena za finansiranje stranke koristi isključivo za ostvarivanje ciljeva utvrđenih svojim programom i statutom,***
- ***da, u skladu sa članom 5. stav (4) Zakona, članarinu uplaćuju neposredno na transakcijski račun političke stranke najkasnije u roku od 10 dana od dana prijema,***
- ***da se u skladu sa odredbom člana 6. stav (2) Zakona o finansiranju političkih stranaka, prilozi uplaćuju na račun centrale stranke,***
- ***da se ne finansira iz izvora koji su zabranjeni ovim Zakonom,***
- ***da poslovne knjige vodi u skladu sa računovodstvenim propisima, odnosno da vodi pravilne evidencije o prihodima, rashodima i obavezama i***
- ***da finansijske izvještaje popunjava u skladu sa podzakonskim aktima koje donijela Centralnoj izbornoj komisiji Bosne i Hercegovine.***

***Takođe se preporučuje:***

- ***da isplatu gotovog novca iz blagajne vrši na osnovu ispravnih knjigovodstvenih isprava. Poslovanje blagajne treba urediti tako da se razgraniče dužnosti odobravanja isplate, evidentiranja i isplate gotovine uz prethodno definisanje visine blagajničkog maksimuma,***

---

<sup>12</sup> Član 15.10 stav 2. Izbornog zakona Bosne i Hercegovine propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.

- *da izvrši usklađivanje obaveza sa dobavljačima i provede odgovarajuća knjiženja u poslovnim knjigama,*
- *da definiše postupke i procedure internih kontrola u vezi sa procesom trošenja finansijskih sredstava stranke i*
- *da poštuje i druge propise, prevashodno propise o poslovanju gotovim novcem.*

**KOMENTAR:**

U ostavljenom roku, Savez za bolju budućnost BiH-Fahrudin Radončić je dostavio očitovanje na Preliminarni izvještaj o reviziji godišnjeg finansijskog izvještaja za 2016. godinu i postizbornog finansijskog izvještaja-Lokalni izbori 2016. godine. Stranka je uz očitovanje dostavila i ispravke obrazaca 3, 3-a, 3-b, 3-f i 4-1 godišnjeg finansijskog izvještaja za 2016. godinu, čime je djelimično otklonila utvrđene nedostatke.

Služba za reviziju je uvažila argumentovane primjedbe stranke, pa je u skladu sa istima korigovala nalaze revizije iz Preliminarnog izvještaja o reviziji.

Zahvaljujemo se direktoru stručnih službi, licu ovlaštenom za finansijske izvještaje i zaposlenim u Centrali Saveza za bolju budućnost BiH-Fahrudin Radončić na dobroj i korektnoj saradnji tokom obavljanja revizije.

Šef Odsjeka za revizijske poslove, revizor

Sanja Tošović

Revizor

Nevenko Andan

Šef Službe za reviziju

Mr.sc Hasida Gušić